



partii naleraq

UKA 2015/29-00

24.11.2015

**Eqqortuusinnaava pisortat suliffeqarfiutaata Royal Greenland A/S-ip tunisassiorfinnik nammineq ingerlakkumangisaminik namminersortunut aallartisartunullu tunisigaangami unammillinninnissamik pituttuisumik piumasaqaatitalinnik isumaqatigiissuteqartarnera (konkurrenceklausul)- pillugu, apeqquteqaat aallaavigalugu Inatsisartut oqallinnissaannik siunnersuut.**

(Inatsisartunut ilaasortaq Jens Immanuelson, Siumut).

Inatsisartunut ilaasortap Jens Immanuelson-ip Pisortat suliffeqarfiutaata Royal Greenland A/S-ip tunisassiorfinnik nammineq ingerlakkumangisaminik namminersortunut aallartisartunullu tunisigaangami unammillinninnissamik pituttuisumik piumasaqaatitalinnik isumaqatigiissuteqartarnera (konkurrenceklausul)- pillugu, apeqquteqaat aallaavigalugu oqallinnissaannik siunnersuutaa Partii Naleqqamiit imannak oqaaseqarfigissuarput.

Partii Naleqqamiit isumaqarpugut inatsisartunut ilaasortaq kinaangaluaruniluunniit pisortat ingerlatseqatigiiffiutaanni isornartoqarsoriguniuk nangaassuteqanngivilluni uparuaasinnaasariaqartoq apeqqusiinnaasariaqarlunilu.

Taamaammatt inatsisartunut ilaasortap Jens Immanuelson-ip oqallisissiaa pissusissamisoorpoq oqallisigilluarneqartariaqarlunilu.

Siunnersuuteqartup assortorneqarsinnaanngilluinnartumik ilaatigut oqaatigaa, nunatta eqqaa aalisagarpasuaqartoq atorluangisatsinnik aningaasarsiutiginnisatsinnillu.

Taamaattumik Royal Greenland A/S-ip tunisassiorfinnik nammineq ingerlakkumangisaminik namminersortunut aallartisartunullu tunisigaangami unammillinninnissamik pituttuisumik piumasaqaatitalinnik isumaqatigiissuteqartarnissaa Partii Naleqqamiit akuersaanngilarput, kisianni isumaqatigiissutaareersimasut illua-tungeriit tamarmik akuerisimasaat imaaliillaannarlugu naalakkersuinikkut akuleruffigineqarsinnaaneratt eqqarsarnartoqartipparput.

Partii Naleqqami tunngaviusumik isumaqarpugut Namminersorlutik Oqartussat suliffeqarfiutaat suungaluarunilluunniit inuiaqatigiinnut kalaallinut iluaqusiinissaq siullerpaajutillugu suliarisariaqaraat. Taamaattumik suliffeqarfiup Namminersorlutik Oqartussat pigisaata, uani RG pineqarmat, taassuma aalisartunut, suliffeqarfinnullu namminersortunut unammillernera tunngaviatigut Parti Naleqqamiit pissusissamisuunngilluinnartutut isingaarpur.

Aamma Partii Naleqqamiit pissusissamisuunngilluinnartutut isigaarpur RG-ip aalisagartassanik pisassinneqartarnera, tassami aalisarneq inuussutissarsiuutigalugu aalisartunit ingerlanneqartariaqarpoq, RG-illu tunisassiorneq avammullu tuniniaaqqittarneq, inuiaqatigiinnut tamarmiusunut aalisartunullu iluaqutaasumik ingerlattariaqalerpaa !

Aalisartut ukiorpassuarni akiluttorfigineqarnikuupput, tassami RG-ip apeqqutaatillugu sumiiffimmi allanik unammillerneqarneq – aalisartunut appasippaaarujussuurtumik akilersuivoq, unammillerfiusunilu unammillertigineqartoq tunuarpat, imaluunniit RG-imiit pisiarineqarpat, taava akit ullormiit ullormut appartinneqaqqittarput.

Aalisariutit RG-imit pigineqartut namminersortunngorsartariaqarput, tassami taakkunaniluunniit nunaqavissunik inuttaliisinnaaneq pimoorunneqanngilaq. Aamma Naalakkersuisunut apeqqtigissuarput, RG-ip aalisariutaanik nakkutilliineq qanoq ingerlanneqarnerneq? tassami tusartaannarparput, aalisariutit inuttai nunatta avataaneersut tunisassiassat ilaannik nunaminnut niusisartut namminneq pissaminnik ? Ilumut tusartakkat taamaattut ilumoorsimappata, pissutsinik taamaattunik iluarsiiisoqartariaqarpoq !

Isumaqarpugut RG tunitsiveqarnikkut aalisartunut periarfissanik pitsannorsaanerusariaqartoq, tassami aalisartut tunitsiveqarnikkut amingaateqarneq pissutigalugu ilaanni killilerujussuarmik tunisisariaqartarmata, ilaannilu nunaqarfimmiik illoqarfimmut isorartoorujussuarmik aqqtigalugut umiatsiaaraannarsorluni tuniniaanerit ingerlanneqartariaqartarlutik, taamalu benzina akisoq.

Partii Naleqqamiit isumaqavippugut Namminersorlutik Oqartussat suliffeqarfiutaat RG namminersortunngorsartariaqartoq. Tassanilu qulakkeerneqartariaqarpoq suliffeqarfissuup nunatta avataaneersunut tunineqannginnissaa.

Partii Naleqqamiit qanittukkut nuannaarutigalugu paasivarput RAL-i maannakkut suliffeqarfiutimi ilai danmarkimiittut taamaatinialerai, taamaaliornikkut nunatsinni suliaasaqarfiit aallunneqarnerulissammata.

Aamma Partii Naleqqamiit assut soqutingaarput Namminersorlutik Oqartussat suliffeqarfiutai, suliffeqarfinnut sunut allanut aningaasaleeqataasimanersut, tassami suliffeqarfiutitta ilaata nutaarsiassaqartitsinermini maani nuummi atuarfimmumut namminersortumut aningaasaleeqataasimanini ilaatigut nalunaarutigimmagu. Pissutsit taamaattut Partii Naleqqamiit apeqqusertariaqarpavut, ilumut inuiaqatigiit tamarmik pigisaat, inuit pisuujunerusuinnaat atuarfiannut aningaasalersueqataassanersut ? tassami assersuutigalugu Innaarsummiut meerartai taamatut periarfissaqanngillat.

Taamaattumik Partii Naleqqamiit isumaqarpugut Namminersorlutik Oqartussat suliffeqarfiutai tamarmik qulaajaaffigineqartariaqartut, taamaaliornikkut piginnittut, tassa inuiaqatigiit, suliffeqarfiit suliassaviinik tulleriiarisinnaaqqullugit.

Siunnersuuteqartup apeqqutit soqutiginarlut arlallit suliffeqarfissuarnut uagut kalaallit pigisatsinnik taajukkatsinnut tunngasut saqqummiuppai.

Soorlu uku:

- Pigisatsinnik pinnguartitsinerput qaqugu unitsissavarput ?
- Qaqugu piginnittut aalajangiisinaatitaalisaaqut ?
- Selskabiutivut aqussinnaajunnaarsimavavut ?
- Pinnguarfigineqarpugut immaqqa ikioqatigiissinnaanngigaaratta ?
- Ingerlatseqatigiiffiit ilaat angivallaalersimappaat allaat inuiannik sullissinissaq soqutiginarnerpaajunnaarsimalluni ?

Siunnersuuteqarput apeqqutaa siulleq, tassa pigisatsinnik pinnguartitsinerput qaqugu unitsissavarput ? - taanna Partii Naleqqamiit imannak ersaritsigisumik akisinnaavarput:

- Apeqqutaasariaqanngikkaluarporluunniit uagut naalakkersuineramik suliaqartugut qaqugu Suliffeqarfissuarni pineqartuni siulersuisoqarnikkut aqutsisoqarnikkullu, nunatsinni najungaqartunik, minnerpaamik kalaallisut, danskisullu oqalussinnaasunik, nunatsinnullu tamakkiisumik akileraartartunik, minnerunngitsumillu nunatsinnut iluaqutissanik amerlanerpaanik anguniagaqarlutik sullissilluarsinnaasunik toqqaasinnaanissarput. Takorlooriartigut, danmarkimi suliffeqarfissuit angisuut ilaat, soorlu assersuutigalugu Mærsk MC-Kenny Møllerip suliffeqarfiutimi ilaat ingerlanerliulerpat imaluunniit siulersuisut piginnittut isumaannut naapertuutinngitsumik iliuuseqarpata, taava qularnanngilluinnartumik

piaarnerpaamik immikkut ittumik ataatsimeersuarnissamik piumasaqassapput, siulersuisunik taarsiinermik kinguneqartumik.

Siunnersuuteqartut apeqqutaasa aappaanut, tassa qaqugu piginnittut aalajangiisinnaatitaalissaagut ? tassunga imannak akissuungut:

- Aalajangiisinaassuseqarpungut, apeqqutaaginnarpoq inatsisartuni amerlanerussuteqartut aalajangiinissamut piumassuseqarnersut aammalu Naalakkersuisut piginnittut sinnerlugit allannguissamut suliamik qanoq sukkatigisumik piviusunngortitsisinnaanerat.

Siunnersuuteqartup apeqqutaasa pingajuannut, tassa Selskabiutivut aqussinnaajunnaarsimavavut ?

- taanna isertuunnagu ersarissumik AAPPI-mik akiinnartariaqarpoq.

Siunnersuuteqartup apeqqutaasa sisamaannut, tassa; pinnguarfigineqarpugut immaqa ikioqatigiissinnaanngigaaratta ?

- apeqqut aamma miserratinagu ingerlaannaq AAPPI-imik akisariaqarpoq, tassa uagut kalaallit ajoraluartumik suleqatigiissinnaanermik nukilaaffeqarnerput, tikisitanit atorluarneqartarmat.

Siunnersuuteqartup apeqqutaasa tallimaat, tassa Ingerlatseqatigiiffiit ilaat angivallaalersimappaat, allaat inuiannik sullissinissaq soqutiginarnerpaajunnaarsimalluni ?

- Apeqqummi uani aappimik aamma akisariaqarpugut, Suliffeqarfissuaq Royal Greenland A/S pineqarmat, tassa soorlu siuliani oqaatigereeripput, Suliffeqarfissuup namminersortunngorsarneqarnissaa Partii Naleqqamiit pissusissamisoortut isumaqarfingaarpud.

Tamatta nalunngilarput aalisarneq nunatsinni inuussutissarsiutit pingaarnersaringaat, taamaattumik aalisartut ilaatigut inuiaqatigiit suliffeqarfiutaanik aalisarnikkut unammillerneqarnerat Partii Naleqqamiit assut akuersaaruminaatsipparput.

Aamma Suliffeqarfissuup aalisartunut aalisartullu kattuffiannut pissusilersuutigisartagai akueriuminaattorpassuarnik ilaqarput, tassa aalisartunut suliffeqarfissuaq unammillertuunani tunisassiornerinnarmik isumaginnittuusariaqartoq Partii Naleqqamiit isumaqarpugut.

Naggataatigut Air Greenland-imi Namminersorlutik Oqartussat piginneqataassutaasa allanut tuniniarneqarsinnaanerisa eqqarsaatigineqartariaqalinnginnera Partii Naleqqamiit ilanngullugu partiinut allanut eqqarsaatigeqqarput.

Partii naleqqamiit siunnersuuteqartut taama apeqquteqaateqarneranut siunertai paasissallugit assut soqutiginaartippavut.

Taama apeqquteqaat aallaavigalugu oqallisissiamut akissuteqaateqarpugut oqalliseqataaqqinnissatsinnullu qilanaarluta.